

湖南文徵

湖南文徵卷六十七

湖湘後學集編

序十二

癸卯同門齒錄序

羅典

凡入學以齒。古天子諸侯之世子尚然。湘之西有靈麓讀書堂。其於斯傳習焉者。九郡四州之士皆隸於省。從統稱如其一鄉。以是綴屬爲同師朋爲同志友。其秩秩固宜。余抗顏校課日夕。晤語言皆能辨之。其閒或髭鬢皤如束身就弟子列而安焉。每窺其握管爭長。沈凝至漏淡。面色變滅不爲苟止。何堅慤乃爾。謂訖於諸生非情之能甘。稽其儕輩有屬先膺歲薦號明經。還

復委懷相依如不得已則又奇矣至其襤被擔囊以來攬几榻而處疲頓清苦各親得於存問展省中此殆少壯所大同而老亦與焉耳然至者類輕遠路水犯風濤陸衝泥雨惟所之齋頭日再食特粗糲無加餐佐具率惡又強半不得參官給例額沾潤分膏亦絕不聞歌行之難與居之大不易或廢然生沮退想也其他若里居云邇及夫有力得懷資自贍又無論已爲綜計之數至百六十人有奇噫豈不盛哉顧學殖鄙淺如余無所出以塞於隨相慕悅之意於私省實用怵然計先時以閒息游知傍院隙地多蕪傭人闢之令浹剷草芟調巨礫務盡窪則潄水栽荷稍高及堆阜種竹取其行根多而繼增不息也其陂池岸

旁近濕。擿柳或木芙蓉。取其易生也。山身舊多松。餘山右足斜平。可十數畝。築爲圃。增植桃李。取其易實也。是外蒔雜卉成行。作叢生。如紫薇。號百日紅。山躑躅。每一歲花再見。取其發榮齊而照爛靡已也。凡余幸得與諸君子共周旋。此物此志。卽將憑以自明。力不逮而心逮之。會茲秋當貢士。翕然敬業。以篤樂羣之歡。請踵舊事。鐫同人齒錄一帙。維余齒稍長。輒擬入而同其樂。無索居而離羣。亦實樂其可以羣也。不黨也。竝錄付梓。列卷端第一。繙次二至末。皆雁隨編。最前者余老友也。最後去余遠。亦昔所忘年交也夫。

案近聞之安仁歐陽世洵信甫云。當年有某邑某君。居麓院。

中二十餘年與鴻臚主講相始終其課藝固不常列優等也
去之日涕泣頓首於主講之靈曰今而後不能復居於此矣
事師終矣其爲誠篤君子可知惜信甫忘其姓名信甫侍其
祖侍御居院日久其說不妄矣汝懷埏記

己酉同門齒譜序

羅典

伏維明歲庚戌恭逢

皇上八旬萬壽

詔以昨戊申預行

己酉正科以今己酉舉

恩科鄉試楚南九郡四州多士咸歡

忤踴躍仰期無負

聖天子作人之至意嶽麓書院爲先賢

講學地鼓篋來游者不絕於途且茲歲距丁酉一紀例舉明經

滇中錢南園學使循正陪例邑取三四人與選者爭自淬厲胥

來就學資觀摩以故學徒至是極盛多苦學舍不能容余自壬

寅主講此閒至癸卯諸生以古者學必以齒於是取同業者循

長幼編次爲譜余序之忽忽踰六年矣初壬寅癸卯閒嘗闢院

旁隙地爲園池加卉木點飾略載前序中時同人息游多興以

八景標目繫之韻語備今古各體彙成帙付梓存之。今則荷英
爛漫墩之上簇錦團花其桃李俱成林高者至丈許他如桐柳
列植或綠蔭夾道或青煙覆地咸鬱蔥成目前勝概凡皆以爲
時既久規模有成事類然矣。院之右舊有小土阜當曲澗活水
前以丁未冬拓而大之。構茅亭其上四面近柱足橫板供坐具
外有數陂方員廣狹不一式周環之。別有巨陂約占地二十畝
綠波溶溶當院之左以近夫子廟名曰黌門亦卽戊申初春乘
水退減盡瀉其停蓄從中央累石培土作基高八尺五寸置亭
覆以瓦長二丈橫分十之八簷宇軒竦欲翔周以木欄仍注水
令滿綴木橋十尋以便往來不時至者多心羨其空涼忘暑云。

今年夏四月復於院內講堂前跨月臺建敞廳六楹敬擬明歲
秋八月萃楚南紳士恭祝 萬壽堂內舊懸 皇上御書

道南正脈賜額

宸翰光照

天顏咫尺麓山以衡嶽爲

宗於此竊效嵩室之呼華封之祝其境地庶幾無少褻焉工旣
竣而書院庭除所際氣象崇閎亦早於舊有加也諸生沐 國
家雅化深仁萃處名勝優資廩親師取友而外晨夕出入會心
不遠皆得調塵俗以親雅意略弔小而與大觀裨益良多矣況
復逢掄才大典選拔科舉兩途並通其及時騰達當指不勝屈
茲踵癸卯已事爲譜齒之蓋以誌人才盛集皆前後所難猝得
者非直敘列明雍容而已余年旣七十有一仍覺神明未衰每

評點課藝見一題各出機杼無美不備竊歎其補益智思過半
不啻焉與諸君子周旋久心昵其文采照耀不以離立於獨爲
樂因自敘有生以來至於今合竝鐫之列譜中第一繙亦猶記
憶癸卯之已事固然耳是爲序

嶽麓書院課藝序

羅典

前嶽麓書院課藝之刻由今蘇州太守長沙周君錫號春田嘗從余游起壬寅至丙午凡五年舉於鄉遂聯捷分部游陞郎中以乙卯典試河南後庚申秋奉

命督學黔省請假歸過嶽

麓與余周覽舊所游息卽謁新勅屈子祠及賈太傅周濂溪祠卒至前疏請南省分闈之李大中丞瀛仙祠輒亟歎爲書院之文教科名浸盛實基於此因索余廿年所酌存課藝之佳者哀輯得一百六十餘首攜去學署刊成郵致意念甚淡今距庚申歲紀經六易尚有搜掇所遺亦節次歛得且能手輩出爲文率有法程其見解每得四子書真諦彙之復一百有六首與初刻

之經廿年酌存者數及三之二。名山萃秀，文教之浸盛，日有加知未艾矣。又往春乙丑進士榜，衡山彭君浚得巍然大魁，自有書院以來，科名之浸盛，今爲最，又可量乎？昨臘月望九，值賤辰，荷春田遠自吳中，以屏幅壽余，作排律百韻，作大楷書以千數，懸之照耀堂壁。其詩中亦極快寶臣之大魁，曰：佳話喧閭里，奎光溢黨庠。蓋特藉爲山齋老人導歡洽耳。於時復善寶臣以歸，覲經長沙，泊舟我廬，手奉以聯句，紀七載門牆以爲自壬子及戊午云。此視春田之相依又多二年，而先後出身一皆好我無教，卽以其聯夾懸於屏幅兩端，相與開筵促坐，無他客胥屬院中同人，對酒當歌，匝兩昕夕。余亦健爽忘疲，邁此極歡所由來。

豈偶然哉。茲丙寅新歲。梓人告續刻課藝已蒞事。仍當綴言簡
端。因遂於篇內卽事引伸。以明改歲前之文緣結締。盛集哄傳
有如此。俾凡隔闕未及與者。一想像焉。其目錄宜參入前編。按
經次之。以便檢尋。是爲序。

朱子年譜綱目序

羅典

郴居吾楚上游。其屬邑興甯。多篤行力學之士。李君涵萬先生。自幼喜讀朱子書。今年近七十。猶朝夕一編。孜孜罔倦。企慕愛樂。欲觀朱子行事。以爲身心之資。嘗讀本傳。而病其略。覩年譜而疑其疏。因本朱子著書之體。紀朱子行事之實。參取羣書彙爲一集。綱提其要。朱子體道之大端。無不昭矣。目致其詳。朱子析理之精微。無不著矣。綜觀其出處語默家世里居。歷歷分明。羹牆如見。然後知朱子一生著作。所以發明前聖後賢之遺旨。無不一一見諸行事。與天命人心相表裏。余自乾隆乙未歲。以歸養里居。得掌教嶽麓經十餘年。極念吾楚爲朱子過化之地。

而嶽麓城南兩書院隔江相望。朱子又嘗就訪南軒張子往來
唱酬於其閒。流風餘韻至今未泯。每當秋月春華。偕同人息游
以尋名教之樂。情景所觸。睪然志遠。憾不得從朱子游於數百
載之前。今讀先生所編輯年譜綱目。景仰前哲。力崇正學。殆奉
其身以爲朱子之徒。而及其門矣。而余猶瞠乎後也。前未得邂
逅適願。幸君之嗣君遠經遠緯。與君姪鼂來相依講席。手出君
錄定槁本相示。同堂諸子見之。僉謂人人當讀之書。宜付剞劂。
因撮其大意以爲之序云。時嘉慶二年戊午孟夏。

鼓磔洲羅氏族譜序

羅典

吾宗四修族譜既竣事。距前三修時歷三十有六年。計我七世祖北江公。勑修後。又三世及而尊公續修之。凡越年百有二十。再越年七十有四。乃議三修。得吾族叔祖宗山宏圖二公當世之十一。不以衰老避事。力董其成。蓋此舉難在得人。故須遲久始定。乃今竊覘門祚盛厚。務肫肫乎敬宗收族。益復蔚然大有人也。譜之前值三修。典得親見之。齒既壯。今繼前舉四修。典復親見之。齒猶未及耄。何其易而速。乃至此時。則督修爲吾族叔祖定民公。仍當世之十一。嘗與修前譜。其次爲吾族叔祖竹泉。及族兄建中族弟孔才佐之。初典嘗省二世祖奇山公墓。在湖

田鳳形山典之祖以上數世皆祔葬其下每不免爲牲足踐履語乞定民公通築大壕圍衛之累土平地無所基長約百丈旣諾閱月而工畢其任事之篤信敏幹可例觀矣定民公之弟爲凝命公能侃侃持論不私己阿人以管攝工用爲政從龍屬其姪行特殫心參覈猶懼不盡纖悉復自引姪行起莘助焉至其司彙編之總則爲吾族弟雲皋此實典所愛敬心以今之古人相推奉者少好讀書坐老不釋手初未始於科舉營營性篤孝母沒廬墓側三年食產粗足家無儲峙晏如也居常束身如對客與所知共談累晨夕不雜一流俗語夙長於詩近猶次書院八景韻合古今體多至二百五十首有奇積之成帙通觀之誠